

AKASHVANI AIZAWL

REGIONAL NEWS UNIT

<><><>

LADC FLOOR TEST

Tukin chawhma dar 10 leh a chanve khan Lai Autonomous District Council (LADC) chief executive member (CEM) Pu C.Lalsawmzuala'n thlawptu a ngah leh ngah loh fiahna a paltlang.

LADC a sorkarna (executive committee) dinna tura pawimawh, larsap hnena sorkarna siam thei a insawi United Legislature Party (ULP) hrulaitu Pu C. Lalsawmzuala'n LADC-a MDC 25-te zingah thlawptu 13 aia tlem lo thlawptu a neih leh neih loh fiahna-ah hian ban phar a ni a. Pawmtu MDC 15 an ni a, a duh lo lama phar MDC 9 an ni thung. CEM hian a thawhpui tur thenkhatte hming a puang tawh a. Deputy CEM atan Pu Sanghuliana Mualchin bakah Executive Member (EM) atan Pu Lalzahawma Chinzah, Pu HC Lalengkima leh Pu H. Vanlaltanpuia te an nih tur thu a puan bakah LADC sorkar fuke kim na'n chanvo neitur dang chu remchang dangah la siamfel a nih tur thu a sawi bawk a ni.

Puan tawh angin larsap Gen. VK Singh duhdan angin District Council & Minority Affairs department chuan Pathianni khan MNF leh Congress MDC-te'n an din ULP hrulaitu Pu C. Lalsawmzuala chu CEM atan a ruat a. Thawhlejni khan Lawngtlai district bawrhsap chuan thutiam tirin CEM atan a la lut a. Larsap duhdan angin wawiinah MDC thlawptu a neih ngah tawk leh tawk loh hi fiah a ni ta a ni.

(Desk/Lalnggheta Ralte, PTC Lawngtlai)

<><><>

BORDER FENCING

Central YMA hrulaitute chuan Union Home Secretary Pu Govind Mohan-a hnenah India leh Myanmar inkar ramri hung an duh loh thu an thlen nawn.

Sawm an nih angin New Delhi a Ministry of Home Affairs (MHA) pisa-ah Central YMA hrulaitute hi Pu Govind Mohan-a ho official-te nen Thawhlejni tlai khan an inkawm a. An inkawmna-ah hian India leh Myanmar ramri hung chungchanga YMA ngaihdan zawh an nih angin YMA hrulaitute chuan, NGO Coordination Committee thu ding lai angin ramri hung hian Zofate inunauna a tihchhiat theih dawn avanga hung rih loh an duh thu leh, Mizoram State Assembly pawhin Resolution a lo pawm tawh a nih thu te; India leh Bangladesh ramri hungah Mizoramin nasa taka ram a chan dan leh khaw engemaw zat hung pawna a awm dan te sawi lan a ni bawk. India leh Myanmar ramri hung turah hian Border Roads Organisation (BRO)-in Survey an kalpui mek rualin ramri a cheng mipuiten ramri hungin a ken tel tur an hriat loh thu leh eng angin nge a nghawng dawn tih inhrilhfiahna a awm loh thu Central YMA hrulaitute hian an sawi bawk a ni.

Hei bakah hian, nikum March 15, a Union Home Minister in Mizoram a rawn tlawh tum a Central YMA leh pawl dang te'n an thu thlen bawhzui a nih dan hrang hrang te sawi lan a ni a. Chu'ng zingah chuan - ruihhlo dona atana Central YMA hnena NCB kaltlanga motor leina tur sum cheng nuai 88, sing 9, sang 5 leh 675 ruahman a nih tawh dante, ruihhlo dona kawnga inzirtirna lama hmalakna tur cheng vaibelchhe 2 leh nuai 3 ruahman a nih tawh thu te; Thingsulthliah rama YMA Conference Centre sakna tura cheng vaibelchhe 99 leh nuai 7 dah a nih tawh thu te MHA official-te chuan an sawi a. Chu bakah Constitution 8th schedule a Mizo tawng dah a nih theihna tura ngenna chu diltu 150 atanga 200 vel an awm avanga Committee dinin an ngaihtuah tur thu te sawi lan a ni a. Heng bakah hian Mizo thalaite tana Civil Service Coaching Centre buatsaih chhoh mek a nih thu leh Airport Authority of India (AAI) kuta Lengpui Airport hlan chungchanga thil awm dan te sawi a ni bawk.

He ta Central YMA hruaitu telte hi President Pu R. Lalngheta hovin Prof. Lalnuntluanga, Vice President; Prof. Malsawmliana Gen.Secretary leh Pu H. Duhkima Treasurer te an ni a. Union Home Secretary bakah MHA Official hrang hrangte, Intelligence Bureau hotute, Assam Rifles hotute leh BSF hotute an tel a; Mizoram Chief Secretary Pu Khilli Ram Meena a tel bawk.

(Desk)

<><><>

ROAD REPAIR

PWD Minister Pu Vanlalhlana chuan nimin chawhnu khan Leitan leh Sihphir inkar kawngpui siam that hna thawh mek chu a hmunah endikin, Durtlang khawtlang hruaitute nen an inkawm nghal.

Pu Vanlalhlana chuan sawrkarin kawngpui siamna tura sum a pekte chu a nih dan tur ang taka hman a nih avangin sawrkar sum daihzai zawkin hman a nih thu a sawi a. Kawngpui hi ram hmel lanna a ni tiin kawng siam meka Joint Action Committee-in vilpui tura mawhphurhna a lak chu fakin khawtlangin kawng tha a duh a tilang a ni, a ti a. Tunhmaa vantlang thil enkawl sawrkar tih tur chauha kan ngaihna chu kan kal pel tawh a, tunah chuan mahni ta angah ngaiin, dim nachang kan hre ta hi a lawmawm hle a ni, a ti bawk.

Chief Engineer (Highways) Pu Robin Lalrinawma leh SE, Central Circle Pu Lalrinngheta ten PWD aiawh a thu sawiin, Zuangtui leh Selesih inkar siamthat hna chu he kawngpui thawh zawh ruala thawh tan ve nghal a nih tur thu tarlan a ni. Khawtlang hruaitute pawhin kawng siam danah an lungawi thu an lo sawi bawk.

Kawng siam mek ‘Widening and Improvement of Leitan to Sihphir’ hi km 10 leh metre 25-a thui a ni a. Central Road and Infrastructure Fund (CRIF) hmangin SLT Infracon Pvt Ltd.-ten an thawk mek a, tun atang hun rei lotea zawh beisei a ni.

(DIPR)

<><><>